

## ERINDISBRÉF

### Félagsmálaráð

#### Stjórnskipuleg staða

Félagsmálaráð Hornafjarðar starfar félagsmálasviði og heyrir beint undir Bæjarstjórn Hornafjarðar. Starfsmaður ráðsins er félagsmálastjóri Hornafjarðar en forstöðumaður málefna fatlaðra starfar einnig með ráðinu.

#### Skipan, seturéttur á fundum og áheyrnaraðild

Í félagsmálaráði eiga sæti fimm fulltrúar kosnir af bæjarstjórn að afloknum sveitarstjórnarkosningum skv. ákvæðum *sveitarstjórnarlaga, laga um félagsþjónustu sveitarfélaga, laga um málefni fatlaðra, jafnréttislaga og barnaverndarlaga*. Bæjarstjórn kýs ráðinu formann og varaformann og hverjum aðalmanni er jafnframt kosinn varamaður. Hafi tveir eða fleiri flokkar eða framboðslistar haft samstarf um kosningu félagsmálaráðs, skal sá sem tilnefndi viðkomandi ráðsmann einnig tilnefna varamann hans, nema öðruvísi hafi verið ákveðið í yfirlýsingu skv. 2. mgr. 24. gr. sveitarstjórnarlaga.

Kjörtímabil félagsmálaráðs er hið sama og bæjarstjórnar. Auk kjörinna fulltrúa eiga bæjarstjóri, félagsmálastjóri og forstöðumaður málefna fatlaðra rétt til fundarsetu með málfrelsi og tillögurétti. Þá er heimilt að kalla til á fundi ráðsins sérhvern þann er tengist málum sem fjallað er um hverju sinni. Starfsmönnum stofnana bæjarins er skylt að sitja fundi ráðsins sé þess óskað.

#### Hlutverk og verksvið

Meginhlutverk félagsmálaráðs er að móta stefnu varðandi þá félagslegu þjónustu sem sveitarfélagið veitir. Ráðið fer jafnframt með lögbundið hlutverk jafnréttisnefndar og barnaverndarnefndar. Meðal verkefna ráðsins er:

- ◆ að vera bæjarstjórn til ráðgjafar og veita umsögn um erindi er tengjast félagsþjónustu í héraðinu,
- ◆ að vera bæjarstjórn til ráðgjafar og veita umsögn um erindi er tengjast málefnum fatlaðra,
- ◆ að fylgjast með framkvæmd laga og reglugerða er snerta starfssvið ráðsins, einkum þó laga um félagsþjónustu sveitarfélaga,
- ◆ að gera tillögur að fjárhagsáætlun til bæjarstjórnar um útgjaldaliði félagsmála,
- ◆ að vinna tillögur að reglum um nánari útfærslu á einstökum þáttum félagsþjónustunnar,
- ◆ að hafa eftirlit með því að samþykkt markmið bæjarstjórnar í málaflokknum nái fram að ganga,
- ◆ að hafa yfirstjórn á félagslegri þjónustu sveitarfélagsins sem tekur m.a. til:
  - *félagslegrar ráðgjafar*
  - *fjárhagsaðstoðar*
  - *félagslegrar heimaþjónustu*
  - *málefna barna og ungmenna*
  - *málefna nýrra íbúa*
  - *gæslu barna á leikvöllum og í heimahúsum*
  - *þjónustu við fatlaða*
  - *jafnréttismála*
  - *áfengis- og vímuefnavarna*
- ◆ að vera bæjarstjórn til ráðgjafar og veita umsögn í félagslegum húsnæðismálum,

- ◆ að gera tillögur að fjárhagsáætlun til bæjarstjórnar um útgjaldaliði húsnæðismála,
- ◆ að fylgjast með framkvæmd laga og reglugerða er snerta starfssvið nefndarinnar,
- ◆ hefur umsjón með útleigu á félagslegum og almennum eignaríbúðum sveitarfélagsins,
- ◆ að veita almennar upplýsingar og ráðgjöf um húsnæðismál og húsaleigusamninga,
- ◆ að aðstoða aldraða og fatlaða, svo og samtök þeirra við öflun húsnæðis, með ráðgjöf, við útböð, byggingarframkvæmdir, samningsgerð o.fl.,
- ◆ að sjá um önnur þau verkefni sem sveitarstjórn felur henni á sviði húsnæðismála,
- ◆ að fjalla um önnur þau mál sem bæjarstjórn felur ráðinu.

### **Starfshættir**

Um starfshætti undirnefnda Bæjarstjórnar Hornafjarðar er fjallað í IV. kafla í *samþykkt um stjórn og fundarsköp Sveitarfélagsins Hornafjarðar* og skal ákvæðum kaflans fylgt eftir því sem við á.

Félagsmálaráð kemur saman á fastákveðnum fundartíma tvisvar sinnum í mánuði. Skal gerð samþykkt um þessa fundartíma á fyrsta fundi ráðsins að fenginni tillögu bæjarstjóra. Boðað skal til aukafunda að ákvörðun formanns eða ef a.m.k. tveir ráðsmanna óska þess. Heimilt er að fella niður fundi að sumarlagi og á öðrum tímum að mati formanns. Ráðið getur auglýst einstaka fundi sína opna en verður annars að samþykkja viðveru hvers þess sem ekki á seturétt á fundinum.

Þá getur ráðið staðið fyrir kynningarfundum vegna starfa sinna eða þeirra málefna sem til umfjöllunar eru, og skulu slíkir fundir öllum opnir.

Formaður ráðsins stýrir fundum þess.

Félagsmálastjóri sér um að taka á móti erindum og málum sem leggja á fyrir ráðið. Hann útbýr í samráði við formann skriflegt eða rafrænt fundarboð þar sem tilgreindur er fundarstaður og fundartími og dagskrá í tölusettum liðum. Fundarboð skal sent öllum aðalmönnum (varamönnum í forföllum aðalmanna) og öðrum sem seturétt eiga á fundum félagsmálaráðs. Boðun funda skal fara fram með tryggilegum hætti svo öruggt sé að fundarboð hafi borist öllum í síðasta lagi sólarhring fyrir fund. Fundargerð seinasta fundar skal send með fundarboði.

Starfsmaður færir fundargerð hvers fundar og er ábyrgur fyrir að hún sé lesin upp í lok fundar og staðfest af viðstöddum fundarmönnum. Fundargerð skal greina númer fundar, skv. talningu ákveðinni af bæjarstjórn, hvar og hvenær fundur er haldinn og hverjir sitji hann. Skrá skal mál sem tekin eru fyrir og þess sérstaklega getið ef mál er tekið fyrir utan dagskrár fundarins. Lýsa skal erindum með meginefni þeirra, aðilum og dagsetningum bréfa.

Félagsmálaráð afgreiðir mál með samþykktum, ályktunum og ákvörðunum. Sé mál ekki afgreitt samhljóða, skal greina í fundargerð hvernig atkvæði hafa skipst. Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi sem starfsmaður ráðsins útbýr.

Fundargerð má hvort heldur sem er færa í gerðarbók eða beint í tölvu, en sérstaklega skal gætt ákvæða í *samþykkt um stjórn og fundarsköp Sveitarfélagsins Hornafjarðar*. Í lok fundar skal fundarritari lesa fundargerðina upp og allir viðstaddir undirrita hana í gerðarbók og á útprentun tölvufærðrar fundargerðar ef því er til að skipta.

Með viðkvæm mál skjólstaðinga, skal farið sem trúnaðarmál, og skulu þau færð til bókar í sérstaka fundargerðarbók (trúnaðarbók). Afgreiðslur í trúnaðarbók eru ekki sendar bæjarstjórn til samþykktar. Trúnaðarbókina skal félagsmálastjóri varðveita á tryggum stað.

Ráðsmenn skulu fá hæfilega þóknun úr bæjarsjóði fyrir störf sín samkvæmt nánari ákvörðun bæjarstjórnar.

## Eftirfylgni

Félagsmálaráð, félagsmálastjóri og forstöðumaður málefna fatlaðra hafa með höndum framkvæmd þeirrar stefnu sem mótuð hefur verið á hverjum tíma varðandi málefni félagsþjónustunnar. Formaður og aðrir ráðsmenn skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði félagsmálaráðs að framfylgja.

## Réttindi og skyldur nefndarmanna

Um réttindi og skyldur nefndarmanna gilda ákvæði *sveitarstjórnarlaga* og *samþykktar um stjórn og fundarsköp Sveitarfélagsins Hornafjarðar* eftir atvikum.

Nefndarmönnum er bæði rétt og skylt að sækja fundi nema lögmæt forföll hamli. Nú forfallast aðalmaður um stundarsakir og skal hann þá boða tilnefndan varamann sinn og láta formann eða félagsmálastjóra vita um forföllin með góðum fyrirvara. Flytjist aðalmaður burt úr sveitarfélaginu, falli hann frá eða forfallist varanlega á annan hátt, tekur tilnefndur varamaður sæti hans þar til aðalmaður er kosinn að nýju og eftir atvikum annar varamaður.

Hver nefndarmaður á rétt á að koma máli á dagskrá fundar enda skili hann efni þess til félagsmálastjóra a.m.k. fimm sólarhringum fyrir fund. Nefndarmenn skulu hafa hag skjólstæðinga félagsþjónustunnar sérstaklega að leiðarljósi við störf sín en gæta þess jafnan að samræmi sé í afgreiðslu mála. Í atkvæðagreiðslu um málefni á vettvangi félagsmálaráðs eru nefndarmenn ekki bundnir af öðru en sannfæringu sinni og skráðum reglum. Þá skulu þeir virða í hvívetna *samþykkt um stjórn og fundarsköp Sveitarfélagsins Hornafjarðar*.

Nefndarmenn, félagsmálastjóri og aðrir sem fundi félagsmálaráðs sitja eru bundnir þagnarskyldu um það sem þeir fá vitneskju um á fundum eða í öðru starfi sínu fyrir félagsmálaráð og ætla má að leynt eigi að fara samkvæmt eðli máls, lögum eða samþykkt 2/3 nefndarmanna, hvort sem þau varða einka- eða almannahagsmuni.

Nefndarmaður skal víkja af fundi við umræður og atkvæðagreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi. Nefndarmanni er skylt að vekja athygli á því ef hæfi hans til meðferðar máls orkar tvímælis.

## Lög og reglugerðir

Í störfum sínum skal félagsmálaráð taka mið af þeim lögum og reglugerðum sem snerta starfssvið ráðsins, sérstaklega þó *lögum um félagsþjónustu sveitarfélaga nr. 40/1991*, *lögum um jafna stöðu og jafnan rétt kvenna og karla nr. 10/2008*, *barnaverndarlög nr. 80/2002 m.s.b.*, *lögum um málefni fatlaðra nr. 59/1992 m.s.b.*, *lögum um málefni aldraðra nr. 125/1999 m.s.b.*, *lögum um Lýðheilsustöð nr. 18/2003* *lögum um húsnæðismál nr. 44/1998 m.s.b.*, *húsaleigulögum nr. 36/1994 m.s.b.*, *lögum um húsaleigubætur nr. 138/1997 m.s.b.nr 52/2001 og m.s.b.nr. 86/2002*.

Þá skal nefndin fylgja *samþykkt um stjórn og fundarsköp sveitarfélagsins Hornafjarðar* eins og hún er hverju sinni.